

程報

二零一九年一月刊

二零一八至二零一九年度
香港科技大學學生會工學院學生會

前言

相信有上過莊嘅同學都會經歷過 Promotion Period, Inauguration Ceremony, 同埋 O-Camp 等等嘅活動，而我地 ESU 第二十四屆幹事會亦都唔例外。雖然呢啲活動好多人都經歷過，但係喺我地每一位嘅心目中佢地都係一啲獨特而又難忘嘅回憶。我地每一個人都遇過唔同嘅挫折，克服過種種嘅難關，學到各種各樣嘅嘢，亦都有與眾不同嘅體會。

當呢一本程報出版嘅時候，我地嘅莊期會到達真真正正嘅終點。而通過呢一本程報，我地希望可以同各位分享我地每一個人喺呢一刻嘅感受同埋呢一年入面嘅經歷。

最後，我地 ESU 第二十四屆幹事會衷心感謝呢一年嚟支持過我地嘅所有人，包括我地嘅 member，上莊，又或者係 freshmen，無你地嘅支持我地無可能行到嚟呢一步。希望你地嚟緊可以繼續支持 ESU，並將呢個soc帶比我地嘅溫暖傳承落去。

Clement President

2017年7月19-21日，係ESU第23屆0-camp嘅日子，亦係我踏入ESU呢個大家庭嘅時候。就係ESU帶俾我嘅歡樂同溫暖，令我決定上莊去繼續將ESU傳承落去。

過往一年，我嘅任期內舉辦咗形形色色嘅活動。每一個活動都係莊員同我一齊落力去搞，當中付出嘅努力亦係我地共同美好嘅回憶。過往每一點一滴都會成為我人生嘅基石。當我地為咗一個活動而工作到三更半夜時，我心裏都非常感激各位陪住我奮鬥嘅莊員。更甚者係有一眾ESU會員適逢有活動時都嚟捧場，令我地會場門庭若市，蓬華生輝。真係好感謝各位會員嘅支持，給予我機會去為大家服務！

上咗莊之後，我體會到上莊係一種責任，對眾多會員嘅承諾。宜家，更係明白自己要成為下莊嘅一個榜樣。我希望各位下莊嘅將來一年繼續全心為member服務，為ESU帶來更多精彩活動，令ESU綻放更美麗嘅光彩。怕甚麼艱鉅苦鬥，進一寸有進一寸的歡喜！



Louis Internal Vice-President

到咗 Spring Sem, 我地ESU第二十四屆Exco嘅莊期即將完結。好多人都話上莊嘅一年過得好快, 但係我反而無乜同感。或者係因為呢一年接觸嘅新事物實在太多, 做咗好多幾年前嘅自己絕對唔會做嘅事, 所以先感覺咁漫長。

喺而家呢一刻回想返一年前自己啱啱上莊嘅時候, 難免有少許嘅遺憾。雖然「搏盡無悔」、「揮灑青春」呢啲字句成日比人取笑, 但係我都唔可以話當時嘅自己無期待過上莊嘅歡樂同熱血。可惜期待永遠同現實都有落差, 可能付出得唔夠多, 又或者係唔好彩, 到落莊呢一刻我覺得喺莊期入面想做但係無做嘅嘢實在太多。

咁我有無後悔過上莊? 我可以好肯定咁答無。當初有人問我點解會想上莊, 我嘅答案係想喺枯燥無味嘅大學生活入面搵倒一啲目標, 而同時又想喺科大搵倒一個有歸屬感嘅地方。上 ESU 呢支莊的確係喺我嘅大學生活入面加添咗許多色彩同意義, 又令我識到唔同嘅人, 學咗喺各種時候嘅處事方式, 所以我從來都無後悔過。



Hugo External Vice-President

話咁快，一年咁就過咗，自己亦都唔再係freshman，呢一年自己經歷咗唔少事，但係講到最深刻嘅一定係上莊。

上莊都可以話係我大學入面第一個重大嘅選擇，當初嘅我就係抱着一試嘅心情加入咗ESU呢個歡樂嘅大家庭。

呢一年莊期內，搞過大大小小嘅event，呢啲event 背後除咗包含住同莊員一齊奮鬥嘅血汗，更加包含住同member們嘅回憶，多謝各位莊員一路嘅陪伴同各位member嘅支持同參與。

一年嘅莊期已經過去，但係旅程仍未結束，喺未來嘅日子希望自己能夠用自己嘅經驗去幫助下莊，繼續為ESU服務。



Daphne Internal Secretary

回憶最初，懵懵懂懂咁行入諮詢會既課室，大概嗰陣身邊識我既人都覺得詫異，一個本來軟弱內向既有膽鬼竟然會選擇上莊 --- 而當時既我，其實只係一心抱住個試下無妨既心態。

話咁快過咗接近一年半，上莊喺我既大學生活佔據咗絕大部份嘅回憶。老套但無容置疑，當中最重要既收穫，大概就係認識咗一班陪我瘋，陪我癲，陪我笑，陪我喊，願意帶住一個生活白痴周圍玩既朋友。有咗佢地，大概呢世我都唔會經歷咁多個第一次。或許當中唔係每個人都能夠成為知心好友，但佢地每一個人都的確造就咗我每個開心既理由，喺呢度我必須好好鳴謝一下我既莊員仲有上下莊們 <3

呢一年或者並唔完美，有好多遺憾，亦有自責既時候。但我相信我地每一個都付出咗相當多既努力，為既只係令ESU變得更好。

To members: 希望本年度活動冇令你地失望，亦希望各位能繼續支持ESU~
To 莊員們: 辛苦了~ 落莊快樂~



Annika External Secretary

一年嘅莊期真係過得好快，轉眼間已經由一開始嘅 Pro-P去到最後嘅 Publication 2。好多人都話入到U要做曬大學5件事，但係我曾經好肯定咁同自己講過入咗U嘅話就一定唔會上莊，唔會晒時間係啲無關痛癢嘅事情上。咁我點解最後又決定咗上莊呢？係愛？定係責任？我覺得係因為歸屬感。ESU 喺我仲係一個懵懂嘅freshman嘅時候比咗一班朋友我，令我嘅大學生活越黎越精彩、快樂，而正正係呢種感覺令到我想上ESU呢支莊。

莊期內發生過好多唔同嘅事，唔單只要通宵做莊務，甚至要為咗莊務犧牲學業、時間等等。雖然表面上係失去咗好多野，但係而家嘅我覺得上莊絕對唔係一件咁時間嘅事，反而可以比倒機會我去學習平時返學唔會接觸到嘅嘢。我認為只要肯去做嘅話，上莊一定可以擴闊到你嘅視野，而我相信呢個莊期間我地全部都獲益匪淺。有好多機會都係轉眼即逝，上莊嘅機會都係。對我嚟講上莊係一個接觸新事物、增廣見聞、增值自己嘅機會，而今日嘅我好慶幸一年前嘅自己把握咗呢個機會，先可以喺呢一年入面成長咗咁多、學倒咁多嘢。



Gary Financial Secretary

一年容易又落莊，回想起過去所舉辦過林林總總的活動，至今仍歷歷在目。每個活動的成功有賴一班共同奮鬥的莊員及積極參與的會員，容讓我在此向你們表示萬分的感謝！

反思這一年的工作，發現我學會了很多，尤其於待人處事和履行責任上。上莊令到過往稚氣未脫的我多了一份成熟，令到昔日的亞古獸進化成今天的奇異花。這段經歷實在非筆墨所能形容，盼望來年的下莊能夠親自體會，領略當中的辛與甘。

雖有不捨，但人生的旅途就是如此，有相聚，也會有離散，即使再怎麼不願意，還是要說再見。共勉之。



Michael General Affairs Secretary

一年就咁樣過咗去，轉眼間又到咗落莊嘅季節，無可避免咁會有好多唔捨得嘅嘢。而當中最唔捨得嘅嘢梗係同一班莊員做嘢嘅時光，每一個空虛寂寞冷嘅晚上都會有咁多位莊員一齊陪我搞0-camp、溫書、chur GPA。

曾經嘅我都好擔心上莊會影響我嘅學業成績同埋生活，但係經過咁多日夜，同唔同member交流傾計，仲有咁多位莊員一齊做過咁多癲嘅嘢，我好慶幸自己當時選擇上莊。正因為上莊呢個決定，我先擁有一個搏盡無悔，令我自己感到自豪嘅一年。

喺呢度感謝大家對我地ESU一年無間斷嘅支持，希望大家將來都會繼續支持ESU嘅活動。




Wing Information System Secretary

一年前懵懂嘅freshman，不知不覺間走到莊期嘅尾聲。

上莊喺好多人眼中係浪費光陰嘅玩意，但當中嘅收穫比付出更多。誠言，搞好每個活動係辛苦嘅。不分晝夜咁準備Pro-P, O-Camp同大大小小嘅functions，有時候會做到筋疲力盡，但係過程中所帶嚟嘅係畢生受用嘅知識同經驗，會令你成長、變得更好。而經歷一年嘅洗禮，令我知道、睇清好多事，教我為值得付出嘅嘢而奮鬥。理想結果唔會從天而降，頂多只會得到上天嘅捉弄。而作出選擇嘅一刻，就應該有相當嘅覺悟，承擔選擇帶嚟嘅責任同後果。

上莊嘅經驗如人飲水，冷暖自知，非隻言片語能夠概括。真心慶幸擅長錯過嘅我今次冇錯過你地，冇錯過上莊後先會遇到嘅人同事。依一年要多謝嘅人有好多，多謝莊員同上莊對我一貫嘅包容同忍讓，識到你地係我嘅榮幸同福氣。

衷心感謝大家嘅支持，希望大家會繼續支持 ESU 嘅活動。



回憶錄





回憶錄



回憶錄



 @hkustsuesu esu_hkustsuEmail: su_esu@connect.ust.hkSoc Webpage: esu.su.ust.hk